




32.294

4.231

11





鶴徵後錄序

余五六歲時先太淑人教識字每舉古人鄉里官爵表字相問難後漸知著述遂喜筆及細瑣所謂不賢者識其小者也又屢司書局河間紀文敏公嘗以順治初年縉紳書付校閱曾爲之跋南昌彭文勤公嘗以明代貢舉攷俾綜核遂有所述自有制舉以來凡科名掌故之書雖殘紙廢縑無甚關係余必收之遺聞軼事往往而在李子旣訪明經秋錦徵君來孫也承其家學博雅好古於百餘年來文獻尤畱心諮訪先有鶴徵錄之刻茲復著乾隆丙辰詞科爲鶴徵後錄以余同嗜好千里郵書乞序竊念儀徵阮芸臺巡撫有康熙己未詞科撫錄之輯無錫秦小峴侍郎有己未詞科錄之輯詳備無遺余嘗校而序之今觀前

淡菴老屋藏板

所編錄簡核有體要依竹垞鶴書手彙及家乘記載綜括而成之者言必有據事必有徵釐然井然實與二書相發明蓋阮書以淵博勝秦書以辨晰勝而此書以矜貴勝皆足以敷陳朝廷之盛典矣若杭大宗之詞科掌錄幾於自述其事而世或憾漏畧之未免焉既訪出其記誦緒餘爲增損而續之苟蒐博采紀事蹟備故實視詞科掌錄爲尤詳不可與前錄並重也哉嘉慶十四年十二月梧門法式善拜序

鶴徵後錄跋

梅會里李明經高奩嘗撰鶴徵錄以紀康熙己未詞科之人今又蒐攷乾隆丙辰詞科之人作續錄成寄示賡芸屬爲之序錄既有梧門先生之序似可不作而高奩書來索之不已重違其意迺爲之跋曰文獻通考言唐世設科有詞藻宏麗文章秀異之屬宋紹聖時始置宏詞一科大觀改爲詞學兼茂紹興三年乃立博學宏詞科每次所取不得過五人南都此科得人爲盛時習詞科者亦鏗深寧叟撰玉海所以備詞科之業也元明兩朝屢廢至我朝而復古遂爲特詔所舉之制科

恩數最優與者榮之乾隆初所舉人數較之康熙中爲多此足

徵

累朝右文稽古崇儒之效也。賡芸聞是時臨川李先生紱負海內重望一時名下之士必經先生月旦始登薦剡故頗無遺濫。李先生者先朝議公座主也。

高宗純皇帝慎重名器所取雖不多而其報罷之士後來掇巍科躋膺盛名者不下數十輩然則一時之遇不遇雖殊其皆爲懿文碩學之彥有可信者迺六七十之間姓名或就湮沒此畜盒之所以亟亟爲是書也。余卅年前曾一見公車徵士錄寫本蓋以被薦之人記薦舉之事而轉不及此書之詳可見畜盒蒐攷之勤且以備後來掌故家之采輯數百年後吾知是錄之貴當在王保定撫言之上已嘉慶十有六年孟秋之月吳

膠李賡芸跋

鶴徵後錄自序

詞學一科始於唐上元垂拱間自元明以來專用制義取士而詞科久廢至我

朝重熙累洽稽古崇儒特兩開大科以罔羅海內博洽之彥其膺薦辟者名臣循吏儒林文苑俱出其中得人之盛遠軼前代康熙己未薦舉一百八十六人出處大畧既具著於鶴徵錄矣迨乾隆丙辰鴻詞僅有杭堇浦先生詞科掌錄一書復畧而不詳其選入詞館與放還田里既不分曉且取者十數人未取者八十餘人行事撰著均不見於錄覽者不無遺憾此殆未成之書與曩潘德園侍御索閱鶴徵錄藁本復書云笱堇浦先生爲詞科掌錄同時所徵猶多闕漏君能於百年後廣爲摭輯厥功

不淺矣伏念

世宗憲皇帝聖德相承

光昭隆軌登下

明詔令舉博學鴻詞之士

高宗純皇帝登極復申

前旨側席旁求史策罕覲於是中外其薦二百六十七人皆一時瑰奇偉麗之才自丙辰

御試於保和殿後次季丁巳復行補試無論用與不用其文章學問有不可得而磨滅者宋司馬溫公嘗欲乞朝廷設十科舉士有經術精通可備講讀科學問該博可備顧問科文章典麗可備著述科有官職官人皆可保舉此卽唐詞學之遺意而

後代仿行之誠以拘於一格不足展其所長惟制科之舉非通經師古洽聞殫見者不能與薦故登於廊廟足以贊

文治潤鴻猷卽或沈滯山林亦得羽翼經傳發抒華藻入著作之林炳今爍古遭際之隆誠有非偶狀也爰復取丙辰詞科做前錄之例分列次第綴輯遺聞軼事并雜采諸家所著彙而錄之雖其闕或有未能盡悉而傳之後世庶幾徵文獻攷掌故仰見

兩朝盛典實爲曠代所希遇而其時耆儒碩學淹貫閎通之士繼起奮興洵足後先媲美也已嘉慶十有二季歲在強圉單闕易月十日李富孫書於婺州郡齋

鶴徵後錄凡例

己未鶴徵錄前後編次本照朱竹垞檢討暴書亭目及先徵士公所記茲錄分列標目亦悉仿前例惟畧有互異則因爲增易之

是科內外薦舉共二百六十七人惟元年與試李穆堂類藁云一百八十餘人道古堂文集云一百八十四人藤陰雜記云一百九十三人先從祖敬堂隨筆云一百七十六人數各不同卽袁隨園親與 召試而小倉山房集云一百九十三人詩話云一百八十人不能符合良由臨場尙有不入試茲錄並以見於前人著述爲據

詞科掌錄於薦舉人數以舉主爲分列不能知其中選不中

選卽有爲部所駁及病不就試亦未詳盡茲仿前錄悉重爲次第并各分以科目先後其無科目者仍編于後

詞科掌錄祇据薦舉時出身未及詳後日之科目官爵以及著作茲錄悉爲補入其不知者則仍闕如以俟增輯

吾朝兩開大科得人最盛己未諸徵士檢查各郡邑志多有闕漏或并不詳其姓氏是科亦然茲特摭訪同時人著錄及老輩傳聞亦可備將來志乘所采

前後兩制科所錄薦舉人數俱以具題到部爲據己未科欲舉而未題部者甚多概不綜錄茲科如越風以餘姚鄔希文湖海詩傳以錢唐陳章江都馬曰瑄江西詩徵以臨川李茹旻南昌戈溥兩浙輜軒錄以錢唐唐樞歸安沈榮儁烏程董

煜山陰何暉碧溪詩語以錢唐丁敬皆爲薦舉鴻詞亦不具錄

前錄意在表揚遺行於家傳志銘不備采錄富孫嘗欲蒐輯另爲一編迄未成帙茲錄於諸徵士志傳間采一二以見梗槩

前後兩舉詞科吾家均得膺薦辟前爲先徵士秋錦公後爲先族祖蕉窗公雖未與選亦爲菽林佳話但先徵士公欲選文緯一書當時同薦諸公投贈詩文集頗多蕉窗公爲張司寇文敏公家贅壻旋徙居吳淞書籍散亡未得見其一時酬倡之什故蒐采較尠

乾隆己巳歲奉 詔薦舉經明行修之士迄庚午辛未內外

臣工保舉四十九人諸徵士爲當事交章論薦復膺是舉者
二十八人茲並著於錄亦見一時人才之盛

已未鴻詞諸公著作彙布海內者居多又有當時鉅公藻鑑
人倫操牘紀載是科距今七十餘年諸公所有雜著別集未
盡刊刻流傳詞科掌錄外僅有全謝山公車徵士錄又未成
書蒐羅轉難且交游落落淺見罕聞尙有未能悉其出處大
畧者統冀博雅君子或繫桑梓或屬後賢倘有家傳及詩文
遺集鈔錄惠示載爲補輯幸甚

鶴徵後錄目錄

卷首

上諭 題目

卷一

一等五人

劉 綸 潘安禮 諸 錦 于 振 杭世駿

二等十人

楊度汪 陳兆崙 劉玉麟 沈廷芳 夏之蓉

汪士鋐 陳士璠 齊召南 周長發 程 恂

卷二

補試 等一人

萬松齡

二等三人

朱荃 洪世澤 張漢

已入詞館不與試四人

金德瑛 曹秀先 金門詔 全祖望

未試丁憂四人

金虞 嚴遂成 符曾 楊煜曾

卷三

未試病故七人

杜詔 柯煜 孫天寅 魏樞 朱厚章

黃濤楫 葉翥鳳

部駁不與試十四人

許遂 萬經 方黎如 張宏敏 傅王露

葉長楊 宋照 胡浚 宋士宗 于梓

胡期頤 汪芳藻 祝維誥 邵斌

卷四

不就試二十五人

夏策謙 顧陳埈 褚菊書 華希閔 王照

瞿駿 靖道謨 萬承芩 聞元晟 奚源

黃世成 黃永年 方觀承 馬日璐 周京

周振采 余華瑞 龔纓 蘇珥 方貞觀

蔡寅斗 翁照 陸榮柜 陳撰 屈復

卷五

與試未用三十四人

王霖	吳麟	吳銳	陳以剛	劉自潔
孫見龍	丁凝	于棧	沈虹	李清藻
李春耀	查祥	厲鶚	汪援甲	俞鴻德
萬邦榮	徐本僊	劉世澍	車騰芳	汪祚
黃之雋	顧棟高	梁機	梅枚	鄧牧
吳王坦	何夢篆	張振義	徐文靖	魏允迪
饒一辛	鄭長慶	曹廷樞	曹士嶺	

卷六

與試未用三十六人

李紘	王文清	周欽	劉始興	姚焜
劉斯組	韓曾	王延年	甘禾	王祖庚
王系	史鳳輝	胡天游	西成	徐廷槐
劉暉澤	張敘	金鑑	馬榮祖	馬樸臣
戴永植	夏之翰	迮雲龍	張鳳孫	劉大樾
王士讓				

卷七

與試未用二十三人

閻介年	張廷槐	桑調元	沈瀾	楊廷英
李光型	牛運震	王世樞	馮元溥	金焜
張懋連	姚世鍊	秦懋紳	潘遇莘	吳龍見

凌之調 李宗潮 萬光泰 王會汾 周玉章
鍾 獅 伊承茂

卷八

與試未用十六人

沈德潛 趙永孝 葉 酉 金文淳 袁 枚
裘曰修 申 甫 張雄圖 楊述曾 許伯政
沈樹德 吳 槃 張甄陶 張星景 余騰蛟
耿賢舉

卷九

與試未用二十八人

王騰蛟 潘思光 陳長鎮 錢 載 周大樞

龔元玠 尙廷楓 峻 德 李 錯 長 住
陳景忠 許佩璜 施念曾 王作人 王起鵬
勞孝輿 易宗瀛 王 藻 朱稻孫 程 川
易宗浚 鄧士錦 黃天策 閻式鑛 朱 超
江其龍 李 灝 沈 彤

卷十

與試未用三十三人

陸祖錫 龔 正 顏懋倫 邊連寶 邵昂霄
饒允坡 劉五教 毛一聰 李光國 車 文
陳世龍 張廷奏 黑 瑒 陸桂馨 陳一策
吳張元 邱 迴 趙 昱 沈炳震 沈炳謙

劉世基 陳黃中 陸枚 胡鳴玉 葉榮梓
劉鳴鶴 程光祚 許鏘 郭東 胡二樂
方辛元 李希稷 梅兆頤

卷十一

與試未用三十五人

汪臺 盧存心 汪沆 孫詒年 沈冰壺
周炎 陳繩 陳繼善 方鶴鳴 王元芳
陳大炎 傅涵 張錦傳 廖理 陳洪淡
盛樂 鄧獻璋 陳世賢 解含章 田荃
秦涇 周汝舟 張範 葉承點 錢斌
吳溶 劉師鞠 任瑗 趙信 段梧生

卷十二

雜綴

王元 南昌齡 許儒龍 張庚 趙寧靜

雍正十一年四月初八日奉

上諭國家聲教覃敷人文蔚起加恩科目樂育羣材彬彬乎盛矣惟博學宏詞之科所以待卓越淹通之士俾之黼黻皇猷潤色鴻業膺著作之盛備顧問之選

聖祖仁皇帝康熙十七年

特詔內外大臣薦舉博學宏儒召試授職一時名儒碩彥多預其選得人號爲極盛迄今數十年館閣詞林儲材雖廣而宏通博雅淹貫古今者未嘗廣爲摻羅以示鼓勵自古文教休明之日必有瑰奇大正之材况蒙

聖祖仁皇帝六十餘年壽考作人之盛涵濡教澤薄海從風朕延攬維殷闢門籲俊端崇實學諭旨屢頒宐有品行端醇文

材優贍枕經菲史殫見洽聞足稱博學宏詞之選所當特修曠典嘉與旁求除現任翰詹官員無庸再應薦舉外其他已仕未仕之人在京著滿漢三品以上各舉所知彙送內閣在外著督撫會同該學政悉心體訪遴選考驗保題送部轉交內閣務期虛公詳慎蒐拔真才朕將臨軒親試優加錄用廣示興賢之典茂昭稽古之榮應行事宜著大學士九卿會議具奏特諭欽此

雍正十三年二月二十七日內閣抄出奉

上諭朕令薦舉博學宏詞以廣育才之典爲督撫者自應秉公採訪加意蒐羅以副朕愛人才之至意乃降旨已及兩年而外省之奏薦者寥寥無幾以江浙兩省人材衆多之地至今

未見題達此非人材之不足應選乃督撫學臣等奉行不力之故也大凡薦舉之典臣工得以行其私者往往踴躍從事爭先恐後若不能行其私則觀望遲回任意延緩其跡似乎慎重周詳其實視公事如膜外也凡督撫學臣之所考取者不過就耳目見聞之所及彼伏處巖隅學問淹雅素有抱負之士未必肯以文章筆墨求售于有司以倖邀一日之遇合是在督撫學臣畱心訪察加意旁求屏虛名而崇實學以佐國家右文之治如李衛吳應棻合舉二人吳應棻又獨舉二人就中則有宣化府進士夫以宣化北邊一郡尙有可舉之人何況各省內地之大可見李衛吳應棻乃實心爲國家畱意人材者著再通行宣諭無論已奏未奏之省俱著再行遴

選倘因朕此旨而遂昌濫以行其私亦難逃朕之鑒察若果有才華出衆而與例不符者著具摺陳奏候朕降旨其在京三品以上之大臣均有薦舉之責將此一併曉諭知之特諭欽此

雍正十三年十一月初十日內閣抄出奉

上諭國家久道化成人文蔚起

皇考樂育人材

特降諭旨令直省督撫及在朝大臣各保舉博學宏詞以備制作之選乃直省奉

詔已及二年而所舉人數寥寥朕思天下之大人材之衆豈無足膺是舉者一則各懷慎重觀望之心一則鑒衡之明視乎

在已之學問或已實空疎難以物色流品此所以遲回而不能決也然際此盛典安可久稽朕用再爲申諭凡在內大臣及各省督撫務宜悉心延訪速行保薦定於一年之內齊集京師候旨廷試倘直省中實無可舉亦卽具本題覆特諭欽此

乾隆元年二月二十四日內閣抄出奉

上諭內外臣工所舉博學宏詞聞已有一百餘人祇因到京未齊不便卽行考試其赴考先至者未免旅食艱難著從三月爲始每人月給銀四兩資其膏火在戶部按名給發考試後停止若有現任在京食俸者卽不必支給並行文外省令未到之人俱於九月以前到京若該省無續舉之人亦卽報部

鶴徵後錄卷首
知之免致久待欽此

欽命試題

制曰儒者之學莫尙於窮經經籍浩繁毋煩臚舉今試撮其大綱凡通儒所宜共曉者爲多士詢焉經之名昉於何時五經六經七經九經十一經十三經之名分於何代秦燬雖烈而不能掩其光者藏於何人所藏何書其後出於何地獻於何朝頒於何世各經授受源流何所依據章句註疏傳解箋詁之屬有何異同其施諸學宮用以取士者何所因革又如古有三易夏何以稱連山殷何以稱歸藏周何以稱周易且連山不始於夏歸藏不始於殷周易不始於周其說可得聞與傳周易者有四家其興廢可得考與書何以有古文今文之別詩何以有齊魯韓毛之殊春秋左氏公穀而外又何以有

鄒氏夾氏鐸氏虞氏之類諸家分門別派其說可悉數與禮始於高堂生顯於后倉其轉相傳述者誰與二戴何刪馬氏何補冬官何闕儀禮何逸羣儒議論紛紜其說可詳陳與論語何以有魯論齊論大學孝經何以有古本今本尔正或曰周公作或曰子夏作其說何居孟子何以或刪或疑或翼或尊何其識之相遠與惟中庸無異說而學庸二篇原皆載於戴記其別爲詮說而列於四書者自何而始與凡此經傳源委其能條分縷析闡其微言抉其奧義而銖黍之不爽與漢唐以經學取士或專通或兼通或帖十通五皆得與選舉之格多士果能博學該通條對精詳斷制明決者固膺上第卽或就所已知各抒所見而言有條理詞歸雅馴亦足以備采

擇其悉言毋隱朕將親覽焉

制曰儒術學術之要先經次史凡具淵通之學必擅著作之才然非熟於掌故周知上下數千載之事理而剖決其是非者不足以語此則史學尙矣今之稱正史者皆曰廿一史豈廿一史之外別無正史與又豈正史之外別無他史與考之漢唐宋藝文志及隋經籍志所載諸史其名類甚多而稱史學者惟以馬班諸人爲宗何與史記漢書成於遷固不自遷固始也開之者誰補之者誰解之者又誰也范史一書與馬班並稱三史而袁宏荀悅之作獨不可媲美與陳壽之志帝魏退蜀正統已紊孰稱其是孰正其非可與三史並傳與卽三史之書又果無遺憾與晉書創于何人共有幾家唐太宗命

房喬等再加掇次所稱房喬者何人也其稱房喬等者又其幾人也觀其文多駢麗史體固應然與南北史皆成於李延壽而考之南朝北朝各有專史乃延壽復爲合之合者可取則專者宜刪專者既行則合者可廢而八書二史皆得並行辭多重複後之作者獨不可彙而修之與六朝之後隋書頗善其所撰諸志綜覈尤工近世儒者專稱五代史而不及隋書又何說也唐書新舊二編各有短長自新書出而舊書流布無多不得並載十七史中其故何與梁唐晉漢周皆有史薛居正嘗修之歐陽氏之本誠善矣而薛氏之本猶可得見與宋遼金三史已不及前代而元史成於倉卒舛謬尤多乃後儒罕能刪定以成佳史豈古今人果不相及與且史之體

有二曰編年曰紀傳紀傳之善自司馬遷史記始而編年之善則自司馬光通鑑始通鑑本春秋之法至朱子則綱仿春秋目仿左氏而前編續編之作亦皆得其遺意此外體例甚繁沿革互異作史者奚啻數百家多士有能悉數其姓氏詳其名目以證其是非者與將備舉作者之優劣以考正諸史之得失則一代著作之任殊有厚望焉母剿說母雷同母苟且以千名母徇人以自誤有志進取者尙慎旃哉其各矢乃心獨抒所見以毋負朕延訪之至意

五六天地之中合賦

以敬授民時聖人所先爲韻

賦得山雞舞鏡

七言排律十二韻得山字

黃鍾爲萬事根本論

欽命補試題

制曰士不通經不適於用治經之學於民生本務先王體國經野之宜尤所當考詳而切究者周禮九職首列三農所謂三農者以地別耶以人別耶其各見於注疏者同異若何禹貢之三壤周禮之再易尔疋亦曰三田又何所稱指也上農夫食九人下至五人又何差別之殊也夫通勞逸而人力可均畫井疆而地利先辨井田五義見於何書條目若何五地九土九地九田九等十二土分見於何書其條目若何多士剖析言之無泛無隱朕將親覽焉

制曰稽古碩儒名臣嘉猷讜論彪炳方策畧舉數端聊用咨詢夫六籍之微言無論已三本六務三具四齊其說維何賢良

三策鼂董不同者焉在言世務書嚴徐所見者孰優仲長統之稱政論申鑒之詳政體其言可采者皆得而敷陳與嗣是而後莫切於十思之疏五規之論至以十事陳說唐宋諸臣不一而足何人何事孰得孰失可得而論述臚列與伊川言先務紫陽言大本純儒之學異於管荀諸人者又何在也多士數其辭陳其義能條對者朕嘉與之

指佞草賦 以生於堯階有佞必指為韻

賦得良玉比君子 七言排律十二韻得來字

復見天心論

鶴徵後錄卷第一

一等五人

嘉興本



沈甫輯



劉綸字春涵號繩菴江南武進人廩生由禮部侍郎江蘇學政
張廷璐薦舉授編修累官至文淵閣大學士加贈太子太傅諡
文定入祀賢良祠著有繩菴內外集

文定家本舊閩力學敦行以文詞受

高宗純皇帝知遇游歷執政康熙己未制科五十人惟華亭王
文恭公位至宰執而文定亦以鴻博起家立朝風度端謹
尤堪媲美在政府十載明良契合襄贊雍容遇事直陳無所
依附與劉文正公同在相位尤稱善品望亦相亞故時有南

劉東劉中堂之稱後以艱歸里依然一老諸生出入從不乘輿投戚友名柬未嘗作大字洵可爲縉紳居鄉之法生平以清節自持歿後囊橐蕭然毫無資產後人至賃屋以居

錢文端武進相公繩菴內外集序云

今上御極之元年遵奉

世宗前詔復開制科武進繩菴相公以諸生應試

欽定第一識者謂制科不數舉與斯選者較春秋得雋之榜爲難而冠倫魁能鬱爲選首則又儒生不世之殊遇也公旣以詩賦通籍不數年由坊局躋列卿趨走 禁禦益矢勤慎

眷注有加遂忝揆席屢柄文衡士之遊其門者咸以爲斯文之嫡系在焉予曩佐秋官每直次連茵接席欸語移時暇輒

攷評所詣因得叩其底蘊則淵沚澄深未易窺測大要求其原于經暢其支于諸史百家蒐羅繇富歸于雅醇予得謝歸田二十餘年曾郵寄所刊詩文就正客歲入京公出內外集若干卷請予序旣卒讀益歎前此心賞之不虛也間嘗與公論爲文大畧極言鄉曲俗學罕識經訓本旨讀公集亦可以知所趨向矣

湯緯堂炙硯瑣談云大學士劉文定公武進學廩生年二十六舉鴻詞科擢第一 廷試五六天地之中合賦諸徵士不解所出多瞠目縮手公獨揮翰如飛桐城張文和公故睨公卷對衆朗吟始其得題解詩題山雞舞鏡有句云似擬投林方戢戢可能對語便關關一時傳誦時吳郡沈歸愚宗伯亦

以諸生赴 召試未第頰首曰吾輩頭顱如許乃不如一白
望後生得不愧死

王述菴蒲褐山房詩話云文定謙和恭謹尤以清修自厲少
在尹文端公幕府得其指授繼以鴻博第一人入翰林汪文
端公愛其才兼重其度晚年尤與劉文正公相得和而不流
無所附麗代 言應 制皆爲一時之冠予嘗以要事繕奏
藁夜半詣公門請閱公起難燭操筆點定時仲冬寒甚公呼
三公子爲具酒脯而厨傳已空僅有白棗十餘枚以侑酒公
亦自歎其儉陋爲可哂也

繼蓮龕塵定軒譚粹云文定公自諸生釋褐授編修以文章
學術受 知遇供奉 內廷直軍機未三十年忝預閣務天

下皆望爲鉅人長德

純皇帝習知公忠信可倚用又八年而真拜秉節簡諒朝野翕
服薨後

詔皇子臨其喪賻金 賜祭 錫謚

親製碑文 恩禮罕比公爲文取法六朝於詩獨喜青邱子前
後典文武鄉會試者五得士皆有名於時器量凝重未嘗有
喜愠退朝手一冊兀坐服食儉素蕭然如布衣勲業之大者
在人口此亦可見公之德矣

潘安禮字立夫號東山江西南城人雍正丁未進士原任刑部
員外郎降補太常寺典簿由大學士朱軾薦舉授編修官至左
諭德著有東山艸堂集

東山少與張百川江何從之天爵羅勃公曠齊名才華博瞻
工於吟詠著作甚富今所傳東山艸堂集六卷皆其官京師
時所作

杭堇浦詞科餘話云潘立夫有乙卯歲暮遣興云僂指爲郎
近十年當關紙尾浩如煙流光青鏡驚霜鬢素業緇塵委石
田只合巢書消二六敢誇奏牘滿三千山公題目增顏甲策
鈍新添勸學篇

諸錦字襄七號艸廬浙江秀水人雍正甲辰進士改庶吉士散
館以知縣用改就教職選金華府教授由戶部侍郎趙殿最薦
舉授編修官至左春坊左贊善著有毛詩說饗禮補亾夏小正
註絳趺閣集

先生性耿介不隨時俗博綜典籍浸淫不勌幾於寢食俱廢
而掣究經學用力尤深康熙庚子領鄉薦試授中書旋捷南
宮散館改選婺州廣文膺薦再授館職歷陞宮贊嘗纂修三
禮後典試闈晉號稱得士歸田後仍鍵戶讀書好畱心鄉邦
文獻手輯國朝風雅皆浙中諸家之詩凡十二冊未經編
定付絳趺閣詩分學古近遊等三十一集共一千五百餘
篇

陸堂絳趺閣詩序云余庚子同年多通經汲古之士同郡
中則以諸君襄七爲最少孤奉慈母之教苦辛誦讀其至性
已大過人復能事賢友仁凡鄉邦之利器引爲琢玉雕金之
助故其今古文雜著皆言近指遠根柢深而英華自茂微獨

擅長于詩顧卽其詩觀之體源六義而音節之古直逼兩漢
魏晉雖唐人所稱善鳴者奚能過焉襄七與余近復同館余
嘗推重其才以爲讀書種子蓋相知久而相期者遠也
鄭璣尺絳趺閣詩序云嘉禾諸子余獲交十餘年其爲人孤
立行一意其中穆然簡靜專壹遇不可輒義形于色弗隨俗
媵阿于人世榮華聲利視之泊如也所著詩文指擢胃腎抉
摘杳微窈然而深淵然而醴攬幽發粹而和以天倪皆味道
之高言非屑屑焉矜才炫博者胸緼恢奇淡於世味左官山
郡不以爲戚再入 承明不以爲欣惟力蘄至于古之道明
言立者今親見揚子雲者或不知敬而後之人讀諸子之詩
文固可以想見其爲人矣

錢文端香樹齋詩注云艸廬少時家貧無買書貲聞吳下書
估某愛客詣之畱數日主人敬其好學謂曰觀君舉止欲讀
竟此架上線裝邪艸廬笑而領之三年靡不徧覽俠君匠門
未第時聞而訪之爲之延譽名遂噪吳下

朱桐川金華詩錄云先生博學好古介然特立居鄉十餘年
卒沈酣載籍不問戶以外事依然一老書生也初官金華八
年士論翕然歸之至今猶有傳其遺著墨跡以爲珍者

袁簡齋隨園詩話云陸陸堂諸襄七汪韓門三太史經學淵
深而詩多澁悶所謂學人之詩讀之令人不歡或誦諸詩秋
艸馴龍種春羅狎雉媒九秋易灑登高淚百戰重經廣武場
差爲可誦又云襄七檢討性情迂傲有弟子求題圖先生開

卷見齊次風侍郎周蘭坡學士先題矣乃大書曰齊大非吾
偶周衰尚有髭兩人都已寫何必我題詩

蒲褐山房詩話云絳趺閣集歿後門人刪定鄭璣尺江以爲
招擢胃腎抉摘杳微陸陸堂奎勲以爲言近指遠根深華茂
皆定論也余甲戌春入都請予相見每日苦茗一甌薤魚晶
飯襍談經史危坐相對必至日下春而後許返先生出臨川
李公穆堂門下生平博聞彊識詩法山谷后山而志節皦然
甘寂寞守耿介權貴之門徵逐之地未嘗一至蓋古之聞人
而世之畸人也

李引樹超孫云艸廬毛詩說二卷通論一卷小序采其首句
仿蘇樂城例也隨篇不拘篇數仿歐陽公張宛邱例也先左

證後發明毛鄭諸子外有佳說則采之有奧義則補之所以
廣益也饗禮補亾一卷以吳幼清所補儀禮經傳諸篇獨饗
禮尙缺因據周官賓客之聯事而比次之并采傳記中相發
明者條注其下以補焉夏小正詁一卷則專釋名物多以經
詁經

于振字鶴泉號秋田江南金壇人雍正癸卯一甲第一名進士
授翰林院修撰降補行人司司副由戶部尙書史貽直薦舉授
編修洊陞侍讀學士

先生以第一人登史館文采風流照耀海內視學湖北獎拔
眞才有知人之譽以事降行人薦舉鴻詞復以甲等入詞垣
士論榮之在京邸日與周石帆諸襄七陳句山諸公時相酬

偶夏醴谷有集于鶴泉寓齋詩云朝回聯步出 承明共說
君家新釀成不速自來文舉座有懷同賦退之檠酒杯春近
圍爐節街柝寒呼守夜兵霜月滿天俱酩酊更烹香乳滌餘
醒

杭世駿字大宗號堇浦浙江仁和人雍正甲辰舉人由浙江總
督程元章薦舉授編修尋罷職放歸著有續禮記集說金史補
史漢北齊疏證前後漢書蒙拾文選課虛續方言詞科掌錄榕
城桂堂等詩話道古堂詩文集

先生讀書五行俱下博綜廣覽於學無所不貫所藏書擁榻
積几不下千萬卷沈酣其中幾忘晷夕故發爲文章宏肆奧
博一時莫與抗者雍正王子以孝廉充福建同考官在史館

纂修三禮奉 命編錄 內府書籍應 詔奏陳四事下吏

議落職然

高宗皇帝仍納其言天下督撫漢人泰半於四條中已行其一
又曰天下藩庫宜有餘款存留以備不虞先生已削藁並不
以示人歸田後仍嗜學不倦自號秦亭老民與里中耆舊及
方外之侶結南屏詩社日以吟詠著述爲娛

王曾祥送杭大宗北行序云吾友厲鶚杭世駿博覽精覈於
學無所不貫所爲文詞高旨深若觀濤重溟莫得畔岸顧自
壯盛僅充秋賦志用不達連屈于春卿世之人合二君之遇
觀其所爲功幾疑學廣聞多匪所以適用蓋古制不講於茲
六十年矣自

聖祖仁皇帝御極之十七年頓紘舉網特闢大科一時苞純稟
精之彥應運磨至揚輝宣烈照灼貫古迨後良遇弗再決科
發策僅循常選末師後進靡所傾風二君枕經菲書含英發
藻獨知而寡諧供已而殫力故學古之獲二君獨深疾驅方
輪人之疑二君滋甚茲

天子嗣暉隆緒側席幽潛興繼舊典浙省郡邑博學鴻詞薦者
前後合六十人呈試大憲掇什之二三二君以瑰麗卓越炳
乎十八人之列以十一郡之廣旌簡所及僅止數人得無少
隘然上嚴虛授下顯良具拔尤升萃乃獲二君四海稱雋等
競疇曩見少之意其亦可以不作矣

詞科餘話云予自乙卯除夕辭家以丙辰正月晦抵都時被
徵之士磨集京師故人吳江迮雲龍錢唐桑調元符曾喜子
至皆有次韻詩

全謝山云萬九沙先生喜引掖後進於杭人物色今編修杭
君世駿於髫年以爲鄭漁仲之流又云董浦董志局於海昌
得絕句共百首請予爲之引董浦之詩之工不待余言海昌
故文獻之窟也董浦拜無垢之祠式持正之里搜錄查職方
罪維諸篇豈僅騷人之遊錄哉

隨園詩話云董浦先生詩以嶺南集爲平生極盛之作題陳
元孝遺像四律云南村晉處士汐社宋遺民湖海歸來客乾
坤定後身竹堂吟暮雨山鬼哭蕭晨莫向匡門去霜風正撲
人秋井苔花漬荒廬蜃氣蒸飛潛兩難問憂患况相仍拄策

非關老裁衣祇學僧淒涼懷古意豈是屈梁能巢覆汚完卵
皇天本至公蓼莪篇久廢薇蕨采應空劫已歸龍漢家猶祭
鬼雄等身遺著在泉下告而翁袁粲能無傳嵇康亦有兒古
人誰汝匹信史豈吾欺寂莫徒看畫蒼涼祇益詩懷賢兼論
世淒絕卷還時此種詩悲涼雄壯恐又非樊榭寶意所能矣
查蓮坡詩話云杭堇浦編修首唱方鏡詩二十四傳誦輦
下和者自王侯以逮公卿士大夫方外閨秀無不有作幾及
數千家

蒲褐山房詩話云堇浦先生書擁百城胸羅四庫入翰林未
久卽以言事罷歸沈文愨公送之有句云鄰翁旣雨談牆築
新婦初昏議竈炊蓋深惜之也旣歸益肆力於詩古文詞海

涵地負日光玉潔實足以雄長藝林兩浙文人自黃梨洲先
生後全謝山庶常及先生而已乾隆丁丑秋予至西泠相見
共論古今文章流別謂予曰子無輕視放翁詩文至此亦足
名家其冲懷樂善迥異乎世之放言高論者矣先生有十子
自第八子賓仁外餘皆下世諸孫亦零落殆盡其道古堂集
梁山舟侍講刻之生平著述甚夥今付剞劂者未及其半

法時帆梧門詩話云杭大宗自謂吾經學不如吳東壁史學
不如全謝山詩學不如厲樊榭齊次風侍郎特愛杭作淹博
嘗集蘇詩及大宗詩句爲一卷題曰蘇杭集句餘姚黃璋論
詩絕句云安世胸中三篋書贍詞捷給決瀾渠當年緒論曾
叅坐經史詩皆說不如藥師一誤謫千季差比髯蘇仙佛兼

小卷短書齊禮侍蘇杭絕句手題籤

二等十八

楊度汪宇若干號勗齋江南無錫人拔貢生由禮部尚書任蘭枝薦舉除庶吉士散館出知江西德興縣尋丁外艱解職歸著有雲逗樓詩集

勗齋家故饒能勤學砥志以拔萃入成均都下諸公皆欽其才盛爲延譽卒薦登大科散館奉

旨改授知縣宰德興日有政聲後以憂歸遂不復出

陳兆崙字星齋號句山浙江錢唐人雍正庚戌進士分發福建學習由福建巡撫趙國麟薦舉授檢討官至通政使著有紫竹山房詩文集

丙辰登大科者十五人杭郡居其四當時稱爲極盛而角藝壇坫主持騷雅尤推堇浦句山兩先生辛酉先生以待講典試湖北所得多知名士生平平易近人有以詩文請質者備極獎借人故樂親之今先生之後克繼家聲仕躋通顯咸以爲厚德所致

杭堇浦榕城詩話云星齋天才駿發而虛襟善下人有寸莛愛不去口大手名篇衆人氣短星齋默而深湛必勝之後已篤於友朋昆弟之誼聞予入閩喜極不寐賦詩寄示余亦依韻答之在閩行雜錄撤闈後同居蕭寺接席聯牀陸孝廉秩旣菰蘆舊雨沈秀才隆則劉盧世親兄事弟畜把袂拍肩筆硯之伍觴疊交錯圍棋射覆雅令窮經均此遙情排爲清課

彥和云灑墨以成酣歌和墨以成談笑此其選也既而星齋奔走上官同人賃船北上禪榻春風聞其雲散分岐雪涕書此志之星齋有承明著作之才庚戌成進士觀政海疆非其好也又云星齋大令爲人和易胸無城府尤好汲引後進有求賢若渴之想善飲每遇知己輒連飲數觥未嘗醉而談鋒彌健生平以古文爲時文故制藝縱橫排異自成一家居京師士大夫奉爲文章宗匠凡應試鄉會者必持文請決利鈍門外屨滿工行書得力古人嘗自言吾書法第一文次之世人但以文譽吾未可爲真知吾者

詞科餘話云甲寅冬余與太鴻旣同被徵星齋以進士學習閩省亦列薦牘濡滯未至時鄞縣全紹衣祖望尙畱京師除夕夢余及太鴻兩人抵京歡然道故有詩紀其事又云與余同薦者凡十人星齋亦自閩至公讌於汪西顛小眠齋徵歌選勝極一時之盛

隨園詩話云陳星齋先生題畫云秋似美人無礙瘦山如好友不嫌多江陰翁徵士朗夫尙湖晚步云友如作畫須求淡山似論文不喜平二語同一風調

蒲褐山房詩話云先生入宏詞游登卿寺侍直上書房兼尹京兆而意致蕭散寢處輒有山澤間儀書法蘭亭取意簡遠梁侍講同書云本朝不以書名而書必傳者陳文簡公元龍及先生也余得其手蹟頗多適滇後皆失之壬寅修西湖志於杭州因索先生遺詩而令子同知玉敦深閱不肯出

及其孫桂生來京師始以全集見示并乞序言

劉玉麟後名藻字麟兆號素存山東荷澤人雍正丙午舉人觀城縣教諭由山東巡撫岳濬薦舉授檢討官至湖北巡撫

素存以詞賦受

高宗皇帝特達之知不數年洊歷卿貳辛酉以少宗伯典順天鄉試後巡撫滇南兼署總督時值用兵緬甸辦理軍需羽檄紛馳以失事機落職

王述菴征緬紀畧云乾隆二十八年劉藻為雲南巡撫緬人滋擾普洱之十三板納檄土司各率兵禦之衆潰走三十年命藻為總督孟艮土司召孟容弟之子召散令人分侵車里土司地據其城藻檄大理順寧營兵七千往勦復之然賊

衆往往竄合未肯即退藻議益兵二千未至而叅將何瓊詔等率兵過滾弄江不設備遇賊兵敗皆論斬然

上知藻書生不諳于軍旅弗深罪也 命陝甘總督楊應琚管

雲南總督事務往視師降藻為湖北巡撫繼革職藻懼三月壬申夜自刎死

沈廷芳字晚叔一字菽林號茶園浙江仁和人監生由兵部侍郎楊汝毅薦舉除庶吉士散館一等授編修官至河南按察使著有十三經注疏正字隱拙齋詩文集

先生為查聲山宮詹外孫少受業於查浦初白兩先生之門得其詩法尊甫東隅先生又日以杜詩課誦長受古文學於方望溪侍郎既入翰林充 武英殿校理日與侍郎講求問

學旋改御史以言事被黜乙丑復起視漕山左以少陵嘗遊任城南池卽於其地創建少陵祠一時俱賦詩紀其事己巳觀察萊州載擢河南廉使望溪侍郎嘗請以湯文正公從祀孔庭先生復踵請之不果行自豫入 覲以母老乞養歸辛卯至京值七十壽錢穉石少宗伯有詩云同徵齒序方三紀前輩心儀有幾人逾年卽卒平生究心經術嘗以監本及毛本十三經注疏多譌脫著十三經正字八十一卷校勘極爲精核洵有功於治經者

方望溪某園文評云賢文筆極清體法具合將來定以此發聲但南宋元明以來古文義法不講久矣吳越間遺老尤放恣或雜小說或沿翰林舊體無一雅潔者古文中不可入語

錄中語魏晉六朝人藻麗俳語漢賦中板重字法詩歌中俚語南北史佻巧語今文士惟畊南冠雲足語此畊南才高而筆峻惜學未篤冠雲特精潔肯究心于經得吾賢而三矣

沈文愨家某園于東集序云癸酉春某園觀察郵示予于東二集皆奉 命視漕改官登萊作某園之詩至是凡四變方

其閉居寄興雅淡絕俗予昔比之清渠寒流空山殘雪及爲翰林轉爲春容和易而骨幹自存迨入諫垣遇事納忠慷慨奮發近少陵問夜如何避人焚艸之什自經沛水入青齊使旌所至輒有詠吟弔古則沈雄激壯登山則靈奇峭削憂旱潦念明發喜兄弟之會合傷朋舊之別離悱惻纏緜協風人之旨所謂變而愈工者耶蓋某園生平無他嗜好惟究心卷

軸居京師退朝入直車中手一編伊唔不絕猶憶己未夏予移寓拙隱齋日夕論詩互有麗澤之益今別去六七年遠隔二千里獨學無友詩格未高某園乃能於政事之餘進而日上其所詣可涯量耶讀其詩輒神往于東萊官閣間矣桑菽甫沈菽林集序云吾同門友菽林起家文學侍從陟西臺時封事如黃鐘大呂之重彌抑然自下而

九重曰都曰俞特嘉許其錚錚誠不負大科也已晚潛究餘山先生之學滋不局于藝而海內久膾炙其清辭麗句臚陳各體高文典冊絕不類俳者之所爲予衰病侵尋輟筆研累歲且羞悔曩時誤耗精於蟲刻爲無聞之人以終老堆堆故紙畧不省視于其集成不可無一言用以諭天下之讀是集者匪徒以此事推之乃其可貴者也顧藻翰本原所在豈有厓哉予耄矣猶願與執友共泝尋之

隨園詩話云仁和沈某園查聲山學士外孫也其尊甫麟洲先生宰文昌被累戍寧夏母查太淑人留居嘉善不從行椒園每歲南北省視極行路之苦有詩云秋生紅豆辭南國春到青銅赴朔方青銅者寧夏山名又雲影有心隨望眼淚痕和綫綻征衣爲厲樊榭孝廉所賞沈歿後張少儀有詩哭之云塞上草枯雙淚白瀛洲雲淨一襟清草枯用裴子野事蓋紀實也觀察尊甫笠亭先生宰印江與沈同戍觀察徒跣萬里號呼求救卒獲安全嗚呼三君皆與余同舉詞科而沈張兩觀察又同舉詩社於李玉洲先生家往來尤狎今皆先後

化去追思六十年中升沈聚散音塵若夢可爲於邑

蒲褐山房詩語云椒園風流儒雅詩筆亦同書法在蘭亭丙舍間乾隆戊寅予入都遇於臨清同行者經月青簾畫舫書籤硯格纖塵不染望而疑爲魏晉間人也爲臬使時嘗欲以湯文正公斌崇祀兩廡事雖不行士論躓之

徐敬齋斐然云先生舉詞科入翰林於時如堇浦次風艸廬諸公以沈博絕艷之文震耀當世而先生獨守望溪家法尺寸不敢自恣人見其鄰於枯過於淡而不知枯而腴淡而旨也以視堆垛爲富塗澤爲妍者其相去爲何如

夏之蓉字芙蓉號醴谷江南高郵人雍正癸丑進士淮安府鹽城教諭由工部尙書涂天相薦舉授檢討著有讀史提要錄半

舫齋偶輯半舫齋詩文集

先生天才宏放於風騷之旨上下數千年間能窺其源流正變之所在一時壇坫諸公莫不斂手推服丙午領鄉薦旋官鹽濱教諭勗以端品立身之道復會城鄉遠近之士考其所業輯爲興藝錄任滿入都成進士薦舉鴻詞官翰林甲子典試閩中次年督學嶺南於治經外示以古文之學錄爲汲古編戊辰移節湖南造士一如在粵東時復論次其文爲湘南汲古編先生星輅所至綜所見聞繫諸篇什著有駢征集後解組歸主講鍾山麗正書院憐才愛士孜孜如不及盛名者德實爲海內所矜式

傳謹齋半舫齋詩序云同年醴谷先生博洽君子也曩在京

師與周石帆陳句山諸公拈題角藝見其舐筆伸紙黃河滾滾落几案間竊心服其才嗣是出使楚粵著說征一集子曾序之而未罄其指要今乃得卒讀其半舫齋編年詩不事雕飾舉數十年中一切憂悲愉懌觸景摠懷皆長言詠歎以矢其音子爲往復雜誦知其得於性情之際者深已醴谷年逾七十神明不衰聞其退休以後日事丹鉛手不釋卷庶幾乎老而好學者予故因論詩而並著之

方望溪半舫齋古文序云癸丑歲高郵夏君醴谷捷南宮文名藉甚而未與木天之選時予教習庶常以三江五湖攷命題醴谷爲文示予見其援摭精確氣色淵古竊謂時賢遠不逮也嗣予刪定唐宋八家文醴谷間出議論與予相辨難往復至再三不厭雖所見畧殊而指歸不異予益重之知其蘊釀者深矣後醴谷舉鴻詞科歷奉

天子簡命膺校士之任著述日緜波瀾愈老視向之所爲殆有進焉予益歎醴谷之邃于學而其傳將寢廣也往者姜君西溟與予論古文之學至前明而衰至本朝而復振今醴谷崛起于後以嗣興爲已任擇而精語而詳駁駁乎與侯魏諸子比烈其亦昌黎所云能自樹立不因循者與披閱之暇爲書其大畧而歸之

隨園詩話云夏醴谷督學廣東有門生鄭齊一者年少貌美舟中妓醉而逼之鄭勃然怒曰使不得夏贈以詩云柔情似水從頭抹硬語如刀帶酒聽

汪士鐸字君宣號筠川江南休寧人副貢生由兵部尙書直隸
總督李衛薦舉除庶吉士散館一等授編修

筠川入詞館後名滿都下踰年散館

欽定一等第九名授職甲子典四川鄉試未幾乞養以歸

杭堇浦劉侍講藻席上送同年汪編修士鐸歸休陽詩云敢

將巨手壓諸公策馬天衢意氣同華省競推湘管健鎖闌一

顧冀羣空神依夕膳黃山下 恩戀晨光 紫禁中聞道潞

河秋漲濶推蓬細細數歸鴻

陳士璠字魯章號魯齋晚號泉亭浙江錢唐人生員由浙江總
督程元章薦舉除庶吉士散館改授戶部主事歷轉員外郎中
出知江西瑞州府著有使蜀集夢碧軒詩文鈔

先生爲邑增生屢試高等十踏省闈不售旣被薦入史館旋
改戶曹辛酉副朱中允良裘典四川鄉試稱爲得人在部壹
以清案牘免拖累不與同官立異亦不曲徇上官爲郎十一
年出守瑞州有惠績中丞胡公寶瓌歎爲品高學邃積勞成
疾死之日官無餘財遺愛在民至今多稱道之

杭堇浦題同年陳戶部士璠使蜀集詩云暫辭畫省擁油旌
雲棧風碓細算程一概不曾驚父老七經端可化諸生卷中
錦字江流濯閣外蘭舟峽雨迎蠻女弓衣新織就笑他春雪
枉知名

隨園詩話云同試鴻博陳魯章以諸生中式卽授庶常途中
紀事云月映湖光分外明蘆花影裏一舟橫夜深聞有鄉音

在曉起開蓬問姓名又嘗夢人贈句云路迴碧落三千里筆
瀉銀河十二時醒殊不解後守瑞州郡廨後有碧落山江右
去京師恰三千里惟銀河句不知後有驗否

陳曼生鴻壽云先大父以增廣生舉大科入詞館改戶曹典
試蜀中得士稱盛出守瑞州持躬廉介莅政和平任戶部時
大學士公某以素精岐黃召之曰吾知爲郎官不知爲醫竟
不往以是十年不得遷後某公事敗始出爲郡守所爲詩早
年追踪漢魏步趨三唐晚乃出入白蘇黃陸陶冶性靈謹守
繩墨直抒胸臆而氣骨自迥

齊召南字次風號瓊臺晚號息園浙江天台人雍正己酉副貢
生由浙江總督程元章薦舉除庶吉士散館二等授檢討官至

禮部右侍郎乞養歸著有水道提綱歷代帝王表後漢公卿表
賜硯堂詩寶綸堂文集

先生少穎敏讀書十行俱下尤具異稟目光炯炯能矚一二
十里嘗登杭州鳳凰山視隔江西興渡人皆歷歷可辨學問
奧博經術湛深自天文律歷以至山川疆域險阻要阨瞭若
指掌又深知古今治亂得失通習掌故既入史館陟卿貳文
章學術一時罕有倫比歸後主敷文講席十餘年獎掖後進
從者雲集適諸城竇東臬先生視學兩浙時相過從輒作竟
日聚城鑰已上漏聲數下猶談論未輟云

秦小峴山人文集云公爲翰林克日講起居注在上書
房行走既由檢討遷中允又遷侍讀學士以大考第一擢閣

學旋陞禮部侍郎歷充大清會典一統志續文獻通攷纂
修官校勘經史定通禮以一諸生不數年驟躋卿貳人皆謂
公特以文詞被知遇顧公問學淹貫世盡知之至其立身
耿介伉直有不愧古大臣者雖同列或不盡知且公位望雖
顯總不出文學侍從之列又遽乞歸未盡其用此有天下所
其惜者累主戡山敷文書院講席造士甚衆族兄齊周華獻
其所著書于巡撫熊公語多不法并揭公十罪以是下刑部
獄議以徇隱擬流

上鑿公無他僅削職放還甫匝月而卒

詞科餘話云天台齊次風讀書之室生竹一莖兩岐波節相
對是年甲寅次風適應大科之徵山陰胡天游爲賦瑞竹詩

隨園詩話云詩占身分往往有之齊次風宗伯年十二登巾
子山云江水連天白人煙滿地浮巾山山上望一覽小東甌
又云壬寅余過天台齊侍郎召南亾久矣其昆季延余小飲
捧侍郎全集高尺許乞作序盡半日之暇爲之翻擲見其鴻
富美不勝收僅記其詠漢武七律一首後四句云親承文景
昇平業開闢唐虞未有天到底英雄晚能悔輪臺一詔是神
仙

陶篁村鳧亭詩話云次風齊公博聞強記觀書目十行下一
覽則終身不忘應徵北上謁某邑宰留宿署中見架上有異
書八冊以借觀請主人曰諾次日黎明將次登程命持書去
曰吾已閱訖矣主人未之信隨抽一二冊詢之皆能探喉而

出不差一字主人大驚公嘗謂余曰吾自紫禁城墜馬腦髓迸流目睛眩轉神魂飛越蒙古神醫亟以牛腦實之卽用生牛皮冒首使真氣聚而不洩且徧體椎扑使十二經脈復具本初三百六十五骨節各還部位三日而知痛五日而知飢不三月而能起立然記性頓減覽書不及旬日卽已遺忘前後如兩人云

蒲褐山房詩話云侍郎賦才敏慧博學多聞自詞林以大考前列卽登卿貳入上書房退直歸澄懷園上馬守門兵舉赤棒驅之馬驚墜地傷于額腦髓盡流皇子聞之亟遣蒙古醫生往視殺牛取其胃絲繩包裹昇回館舍至半夜乃得蘇又傳以祕藥閱六七月始痊然于平生所讀已不能記

憶矣其所著撰皆未能成編惟水道提綱係充一統志館纂修時所撰於源流上下縷析條分使讀者如指諸掌又有寶綸堂文集浙江臬使秦君瀛刻之詩藁尙藏其家

梧門詩話云齊次風少宗伯熟於三禮尤精地理之學假滿時郭韻清先生送行詩有地志似借章亥步天官解訂石申書可謂工切宗伯目力勝人夏棲萬松山中每視雲起必牽一縷如絲繫於峯顛踪跡之獲石數枚有文印之成書畫形後積漸多因以作謚用東坡石鼓韻題長歌紀之所謂謚從乙亥至丁丑松嶺日俾蒼髯叟看雲疑是結繩初得石便同畫卦後行書斜整雁銜蘆繆篆蜿蜒蟲食柳是也劉繩菴杭堇浦趙石函方立亭程存齋諸公皆有和詩阮吾山侍郎云

自謂青天雲盪胸不羨黃金印繫肘苔花千載繡山靈松嶺
三年契石友遂爲一時佳話

李介石穀云先生宏搜博覽強記過人爲閣學時

高宗皇帝於寧古塔得古鏡未詳欵式問朝臣莫有對者先生
引證書史羅縷具奏

天顏大悅顧左右曰是不愧博學鴻詞矣沈文愨公嘗因奏言
天台石梁之奇

高宗皇帝詢及先生對曰荒山磽确不足以勞

聖駕人笑其奏對率易然以此益重之

周長發字蘭坡號石帆浙江會稽人雍正甲辰進士原任翰林
院庶吉士改樂清縣教諭由浙江總督程元章薦舉授檢討遷

侍讀學士降補侍講著有 賜書堂集

先生幼卽刻厲爲詩古文詞博學多才以庶常出爲廣昌知
縣復改教諭薦舉重入詞館值修綱目續文獻通考諸書皆
充纂修官兩奉 使祭告嵩華吳山江淮等處家有 賜書
百數十種嘗乞假省母 恩賜內緞豐貂令歸爲母壽尤極
儒臣之榮

商寶意越風云學士擅校馬之才翱翔 禁近鼓吹休明曾
賦覺生寺大鐘歌應 制稱

旨揮翰捷敏不亞張宮詹向以 賜書堂詩數千篇屬予手定
摛華採藻可方近光隨 輦二集其在永嘉學署有和蘇詩
百餘首最佳曩時見之今已散失

隨園詩話云雍正乙卯春子年二十與周蘭坡同試鴻詞於杭州制府其時主試者總督程公元章學使帥公念祖詩題是春雪十二韻因試日下雪故也蘭坡有句云堆從梨蕊消難辨迸入梅花認亦稀又云余平生所見敏于詩者四人前輩中一爲宮詹張南華鵬翀一爲學士周蘭坡同學中一爲侯夷門嘉縉一爲金進士兆燕俱可以擊鉢聲終萬言倚馬又云斷句入耳有終身不能忘者周蘭坡送別云臨行一把相思泪當作珍珠贈故人又云蘭坡多髯冬日同周元木詠雪和東坡尖叉韻元木押鹽字韻云修髯繞作離離竹妙句清于昔昔鹽

鳧亭詩話云學士博聞強記下筆敏捷超羣余一日訪其家適學士由上書房請假歸詢及近作因以憶家園七律四首口誦一過學士曰吾將依韻和之益少坐便當脫橐余是夕有讌會催飲者甚亟登車去後離不過里許未就坐而學士和章已莊寫一箋至矣學士又嘗奉使祭江源以紙八十番編成一本曰吾歸必吟滿此編余以一律贈行學士卽和韻首書之比歸詩果滿帙無贖紙其好吟如此故生平著作甚富因貪速成未免有率易處而倚馬萬言不煩思索固屬異才

汪小海淮云周石帆官翰林以詩捷敏負重名且晡握管成七言近體三十首

程恂字慄也江南休寧人雍正甲辰進士原任北運河同知由

兵部尚書直隸總督李衛薦舉授檢討陞中允

先生精於三禮在都時嘗延江先生慎修于邸舍互相討論
學益深博入詞垣充 大清會典三禮館纂修官與李少宗
伯清植同彙儀禮之誤極爲研審

杭堇浦寄同年程檢討恂休陽詩云一度看花百首詩有詩
兼酒復奚之劇憐南國音塵杳那解西軒讌賞遲屋外遙山
仍舊識座中熟客半同時明年管領知誰氏留待君看已後
期

鶴徵後錄卷第一

海鹽任 珊校

鶴徵後錄卷第二

嘉興李富孫旣汭甫輯

補試一等人

萬松齡字星鍾號葆青江南宜興人雍正己酉舉人內閣中書
由兵部侍郎楊汝毅薦舉授檢討

先生父伯安先生以詩文名海內迄不獲一第著有鯖餘集
天台齊息園侍郎序之先生文學德行見推于世爲諸生時
偕父客遊滇南流離抑塞父歿于旅寓先生徒步走萬里負
骸骨歸肩脊皆生瘡痂觀者歎息爲之泣下後舉制科入詞
館聲望大著

先生在詞館與同薦諸公時爲吟社分題賦物嘗有雪夜集

清漣社聯句云寒凝綏綏然夏之三歲三會雪騰空勢悠揚

沈廷芳著物冷金鐵漫漫雲霰霏子撩亂瓦溝瞥穿窗透一點

劉照簡影三滅模稜無圭角齊召光怪竦楹稅厚非天地閉

程齊此萬物潔前期見霜淞杭世茲夕盡蟬蛻大白酒深深

朱小把柴烈烈豈矜舊雨來周長聊紹聚星哲順時屆臙臘

劉休徵掃蝗蟹預想麥有秋張漢行看草初茁思艱邁虎冰萬松

齡調燮仰稷契懸知連十稔陳士不但慰載渴遂止無已太

諸錦附詩當補缺起看礬頭山陳兆踏凍除木屑之

二等三人

朱荃字子年號香南浙江桐鄉人生員由大學士管浙江總督
嵇曾筠薦舉除庶吉士散館一等授編修著有香南詩鈔

香南奉使視學四川簞簞不飭并有他事為人所劾遂棄

官走詔捕不得逮繫家屬其弟拘囹圄累年莫可踪跡後

竟不知所終矣

隨園詩話云朱香南子年分校禮闈有句云寄語羣公高著

眼青衫明日泪痕多余甲子分校亦有句云帶入秋闈示同

伴當時落第淚痕衫

洪世澤字叔時福建南安人廩生由福建巡撫盧倬薦舉除庶

吉士散館二等授檢討

華亭黃唐堂先生以中允督學閩中造就人才總持風雅士

子有一藝之長無不誘掖獎厲之叔時與安溪潘亞卿閩縣

張希周輩俱邀拔識兼有無雙之譽後舉制科奉天盧公皆

列于薦牘叔時入詞館潘張亦先後登第八人服其有知人之鑒焉

張漢字月槎雲南石屏州人康熙癸巳進士原任河南府知府由署兵部侍郎王士俊薦舉授檢討改監察御史乞歸著有月槎集

先生嘗守河南行縣過宜陽甘棠砦在其境內僅存故地因補植棠十三本以昭古蹟并以芟棠題集邀同志爲詩一時屬和者甚衆諸草廬宮贊詩云甘棠新補十三枝今日疇賡召伯詩君子須眉皆甚古丈人清畏不鐫碑懸同合浦車爭挽豈必桐鄉像設祠他日翰軒問原隰廣基臺榭幾人知能令望國封嘉樹總爲風詩愛到今郭璞樊光勤補注白棠赤杜想連陰忘勞重整周行芟聽訟當年一片心詎似漫無薑桂性朱唇點綴不能禁

胡稚威送張侍御歸雲南序云張先生爲御史有年旣論事屢上書一日忽假去期不復來夫先生去其鄉萬里以官京師于官復貧行李不計乏車船不顧具滇南之險且遠然乃竟歸方謂其去之愈於其仕其決以果哉夫知止賢也疏廣受之猶足有稱也若夫退不辭祿爲高居不虞辱是懼獨顧其道不失其守伉伉鏗鏗明白以行彼二子之視又何如也先生前守河南值上官紆殘羣屬惴惴風靡獨持理觚拄遂被誣劾其後復用宏詞入翰林改列臺署其夷直茂厚過中州士大夫嘆其去不可留而尤重其別故特於言然

隨園詩話云丙辰 召試有康熙癸巳編修雲南張月槎先生年七十餘重入詞館先生以前輩自居而丙辰翰林欲以同季視之彼此牴牾後五十年余遊粵東飲封川邑宰彭公竹林署中西席張旭出見詢知爲先生嫡孫急問先生遺藁渠僅記秋夜回文一首云煙深臥閣草凝愁冷夢驚回幾樹秋懸壁四山雲生下隔簾一水月沈浮翩翩影落飛鴻雁皎皎光寒靜斗牛前路客歸螢點點邊城夜火似星流
已入詞館不與試四人

金德瑛字汝白號檜門浙江仁和人雍正丙午舉人內閣中書由太僕寺卿蔣漣薦舉乾隆丙辰一甲第一名進士授修撰官至都察院左都御史著有檜門詩存

先生爲秀水汪氏婿讀書金陀園遂家於范湖入翰林累膺遷擢分校北闈者一典試江閩者四視學江西山東順天者五會試總裁者一初任江西時奉

旨有操守甚好取士公明之語得再留任嘗奏請加賑鄒滕飢民徐兗水災宜復黃河故道並得

旨允行性孝友置義田建宗祠鄉人德之

錢文端金總憲詩存序云金檜門先生少博雅宦學吾郡汪丈鶴桴郡中老宿也居范湖稱藏書家予官翰林時奉母假旋往復過從見先生於甥館每出所爲詩春容奧衍有古作者風予一見以國士遇之先生亦心重予引爲知己歲丙辰先生以公車來京師首蒙

聖主特達之知 廷試擢第一松泉汪文端時爲同考雅器重
先生與予尋入直 內廷同趨 禁籟作爲詩歌和平大雅
退食之暇昕夕討論汲古虛受益自淬鍊故職屢遷而業亦
雋上屢典試事東歷泰山華不注之高南踰江淮浮洞庭渡
彭蠡窮三山五嶺之奇每登臨題詠人爭傳誦先生爲人醇
古澹泊宋元人中尤愛東坡梅溪遺山曼碩諸家故其所作
往往相近顧生平著作多不自收拾以故散失不少子員外
忠澤主事潔綴拾遺藁得詩四百餘首請予名其集予以詩
取足存而已一二首與千萬首無以異也因畧敘之以爲後
學趨向

蔣莘畚櫓門詩存序云公寢饋經史至老弗倦斗室一燈丹

黃典籍汲汲如不及性樂佳山水凡使節經過勝區古跡必
命駕登覽至則留連領挹吟嘯久之而後去蓋天懷清曠如
此通籍二十有七年任斯文衡尺者無虛歲雖未膺封疆民
社之寄而騶從所經凡有關大政者皆切實入 告爲
上所嘉許得以施行蓋學具體用心涵忠藎而經世之畧因端
發見者又如此

杭堇浦詞科掌錄云金汝白原籍休寧丙午孝廉官中書舍
人常熟蔣公所薦未及試丙辰以第一人及第授修撰入直
南書房是舉有兩狀元金壇于振鶴泉及汝白也汝白讀
書精細通鑑點勘皆徧五言清微朗潤希風錢劉

蒲褐山房詩話云總憲酷嗜涪翁故論詩以清新刻削酸寒

瘦澁爲能於同鄉最愛錢君坤一督學江西識拔蔣君心餘于諸生中而汪子康古其戚也甲戌予入京師總憲時時招同游宴于一經齋清談終日率以爲常及予南歸又以書薦于前山東吳運使凌雲其愛才推轂皆此類也總憲歿後四十餘年而杭城士大夫請祀鄉賢時予主講敷文因送其粟主奉于學宮歸而重復其詩爲之淒黯

張秋水鑑云檜門先生淹貫經史篤嗜不勑屢掌衡文之任愛才若渴視學江右時獨識蔣華畚太史以第一才人目之先生卒後華畚太史至繪像以祀同人多詠其事知己之感深矣

曹秀先字冰持號地山江西新建人雍正壬子舉人內閣中書由戶部侍郎李紱薦舉乾隆丙辰進士改庶吉士官至禮部尙書諡文恪

文恪公性不能飲健飯每日可盡十盃年十四補博士弟子雍正己酉入選貢中副車壬子舉京兆試考授中書舍人丙辰成進士選庶常散館授編修公天才膽博問學該明自通籍承明以後益求爲有用之學於以上贊

聖治光輝篤實淳用六卿由臺諫歷寺司領成均晉閣學工部戶部吏部各侍郎又特晉禮部尙書侍經筵直內廷其間扈時巡典試事祭告海嶽讞獄浙江充纂修充大總裁遭際之隆近所罕覩而又年臻耄耄寵眷有加賜紫禁城騎馬歿後易名有制亦極儒臣之榮矣

金門詔字易東號東山江南江都人康熙丁酉舉人由順天府府尹陳守創薦舉乾隆丙辰進士改庶吉士

已未開鴻詞科

聖祖仁皇帝特取五十人入詞館纂修明史外如萬季埜斯同姜西溟宸英俱以薦預史局久之未成至雍正初始有全藁世宗憲皇帝復令重修相國張文和爲總裁官東山以鄉貢士薦入史館衆推其才書成當晉秩旋膺大科之徵先入詞垣後竟以試罷職歸

詞科餘話云金易東以孝廉薦修明史長洲沈德潛以詩簡之

杭堇浦送金東山歸維揚序云廡陵金先生與余同就鴻詞之徵未幾東山成進士先余入館援已未詞科舊事握手轂同籍之誼東山善談笑喜賓客圍棋賭酒酣嬉累日夕而不厭胸無柴棘稱心肆口屢尤于人而不以爲悔修飾邊幅者習爲罄折余獨與東山仍其疎野余方倚東山以自壯東山亦以余兀岸不可貶損就余狎不余棄也方是時京師交驩者莫吾兩人甚東山負承明著作之才與修勝國之史直而不阿簡質而當理書成晉秩旣而充三禮館纂修官時方重其事非耆儒碩學專門名家者不獲與是選東山亦恢廓自信思勒成一家言以爲

聖世昌明經學之一助竟以試落館職一旦委而去之余不敏猥以譎劣承其未竟之緒東山與余習以熟於其去也不能

無釋然於其中矣

全祖望字紹衣號謝山浙江鄞縣人雍正壬子舉人由戶部侍郎趙殿最薦舉乾隆丙辰進士改庶吉士散館以外補假歸著有經史問答鮎埼亭詩文集

先生有兄祖謙慧甚六歲而殤太夫人哭之哀忽張目曰吾當再來補之後十年生先生亦慧甚故小字曰補又有傳爲錢忠介轉生者年十四補博士弟子戊申督學交河王公將以賢良薦上書辭之次季卽充選貢壬子舉京兆試春闈下第將歸有詞科之徵遂爲吏部所留時詞科諸公尙未盡集臨川李公以問先生爲奏記四十餘人各列所長李公歎曰使廟堂復前代通榜之例君亦奚慚退之哉其後四十餘

人李公多展轉道地登之啟事應 召二百餘人半與先生通縞紵因得盡其人之文章學術乃彙爲詞科撫言一書而先之以康熙己未百八十六人徵士仿高允徵士頌之例詳書之而接以今科已成大半會放歸未卒業僅得前後姓名及舉主及試錄三卷丙辰先入詞館深以不預大科爲憾丁巳散館列下等歸班外補望溪方公欲薦入三禮館辭之遂南歸殫心著述不復有出山之志續選李杲堂甬上耆舊詩兼修南雷黃氏宋儒學案七校水經注欲註班氏溝洫志而未果主講葢山從者雲集家貧雖至饔飧不給人有所餽弗爲動後往粵東主端溪書院因病歸卒于家先生之學淵博無涯涘于書靡所不窺歷碌貫穿能發前人所未及而於水

道源委考核尤精誠深寧東發以後一人也

詞科餘話云全紹衣撰詞科擬進帖子援据精核爲 名試
諸公所不能及

鮑西岡稗勺云乾隆元年 廷試鴻博全太史擬公車徵士
小錄八卷中式者十五人不第者若干人蓋敘其姓氏里居
世系也更換詞科撫言尙未成書

隨園詩話云全謝山以丙辰春闈先入詞館故九月間不與
鴻博之試丁巳散館外用謝山不樂賦詩呈李穆堂侍郎云
生平坐笑陶彭澤豈有牽絲百里才秣未成醪身已去先幾
何待督郵來有乚仙傳謝山爲錢忠介後身者故有舉子詩
云釋子語輪回聞之輒加嗔有客妄附會云我具夙根琅江

老督相于我乃前身一笑妄應之燕說漫云云按謝山年三
十六方娶滿洲學士春臺之女逾年舉子時忠介公後人名
芍亭者侵晨入賀謝山驚曰何知之神耶芍亭曰夜來寒影
堂中不知何人揚言曰謝山得子故來賀耳此事朱心池爲
余言之余悔在都見謝山不曾一問

袁陶軒鈞云里中范氏天一閣陳氏南軒陳氏雲在樓多藏
書謝山徧讀之復從武林趙氏小山堂借所未見學益沈博
負氣忤俗喜雌黃人物究心鄉邦文獻所著書十數種皆卓
然可傳

未試丁憂四人

金虞字長孺號小樹浙江錢唐人康熙庚子舉人湖北孝感知

縣由工部尙書涂天相薦舉著有小樹軒集

小樹博綜羣籍其所爲文無不根柢經術時藝尤爲世所重詩亦極清麗如詠帆影云高樓暮雨經年別野岸斜陽一片愁柳絮云六代繁華終變滅一生飄泊坐清狂刺蝟云拳如雲後屯邊騎怒卽風生罵客髭體物尤工

詞科掌錄云金長孺以保舉令湖廣之孝感邑人大司空涂公薦于朝旋丁外艱不與試長孺於書無所不讀文筆高秀爲吾鄉人士之魁從人視學粵西有雙江臥遊草詩極清雄

隨園詩話云吾鄉金長孺先生以時文名世不知其能詩也有人爲述其禹廟云授笈儼陪蒼水使奉香猶贖白頭僧晚

步云打頭黃葉忽飄墜知是隔林松鼠來

嚴遂成字崧瞻號海珊浙江烏程人雍正甲辰進士原任山西臨縣知縣由浙江總督程元章薦舉後補直隸阜城知縣陞雲南嵩明知州著有海珊詩鈔

先生天才駿發早已名播海內詩力大思深不拘一格雄渾綺麗兼而有之當時壇坫諸公難與抗手竹垞初白後不得不推爲一家嘗作明史雜詠四卷賦明一代之事古體近體相間曾經浙撫奏進錄入四庫全書存目持論頗多允當海珊詩鈔自序云余少爲詩以偏宕相尙罔識律令吾鄉姚薏田同年厲樊榭方負能詩聲雅與余善而於詩未之許也甲寅被薦居內憂弗逮赴朝考顧虛聲一時藉甚思有以

禳之辛酉夏量移阜昌吾師穆堂先生典試江南止郵亭余
謁見迎謂曰吏亦不易爲知生百無暇獨詩可分余一席慎
毋廢余憬然汗下嗣後收視返聽知功夫有在於詩之外者
厚其所積窮其所變別構戶牖不屑苟同昔人迄於今不自
知其至猶未也然我才亦旣竭矣後梅花詩傳誦京師明史
雜詠人以詩史目之今哀集若干卷都從零佚中以次改竄
無復前後年地可問大參徐南岡先生閱竟評曰君詩必有
所爲始作無一字無來歷筆頭勾得數十斤起楚中余同麓
歎爲知言辱參之於竹垞阮亭二家之間相勸付梓惜乎樊
榭薏田早下世無緣重定吾文此足貽千古知己之憾也
詞科掌錄云嚴海珊令山西之臨縣丁父憂回籍浙江總督

上蔡程公合試一省之士海珊爲第一旋遭母喪不與試七
言造句瘦硬瀧中舟行云修鯉躍波雨點大怪禽呼樹風聲
寒太行云孕生碧獸形何怪壓住黃河暗不驕城隅春望云
雨方得氣能醫草風自生香不借花皆有別材

詞科餘話云江都唐改堂紹祖以名翰林出守吳興雅負人
倫之鑒時嚴進士遂成持父憂居里旣闋徵書屢促以啟辭
之

隨園詩話云讀史詩尤雋者嚴海珊詠張魏公云傳中功過
如何序爲有南軒下筆難冷峭蘊藉恐朱子在九原亦當乾
笑又云海珊自負詠古爲第一余讀之果然三垂岡云英雄
立馬起沙陀奈此朱梁跋扈何赤手難扶唐社稷連城猶擁

晉山河風雲帳下奇兒在鼓角燈前老淚多蕭瑟三垂岡下
路至今人唱百年歌

梧門詩話云嚴海珊工於詠物詩思力過深詠桃云怪他去
後花如許記得來時路也無海棠云睡味似逢鶯喚起酒痕
仍借笛吹消梅云殘笛一聲涼在水遠峯數點碧于煙著筆
幾似李龍眠白描畫矣又海珊詩鹽城徐南岡謂其無一字
無來歷筆頭勾得數十斤起信然如常山旅夜云櫓聲離岸
小山氣壓城寒東坡書院云竹非因月瘦山不厭雲痴冷泉
亭云怪鳥呼風天忽冷危峯到地晝常陰秋草云斷霞古道
無人過寒雨空城有雁飛宿見山樓云如此夜深猶有笛可
能春盡竟無詩

阮雲臺中丞定香亭筆談云海珊司馬詩具兩種筆意如骨
堆石勒漚麻嶺血浴高歡避暑宮盧龍已買防秋塞上谷虛
傳突騎名弓懸屋角秋防虎旗閃城頭夜舉烽鷓盤大漠寒
無影冰裂長河夜有聲造句雄奇詠桃云怪他去後花如許
記得來時路也無蓮花莊云無數垂楊遮不住好風吹出讀
書聲言情旖旎

符曾字幼魯號藥林浙江錢唐人監生戶部學習行走由刑部
侍郎勵宗萬薦舉後官戶部郎中著有春鳧小蘂半春倡和詩
賞雨茅屋雪泥紀遊等藁

雍正戊申特奉

諭旨令內外臣工各舉賢良方正之士送部引見擢用藥林

爲太常卿汪公濬保舉分部學習爲戶曹處膏不潤襟情高
曠日事吟詠詩超然意遠亦適如其爲人

胡稚威符員外詩序云員外詩名天下三十年同時多自負
或與爭聲終弗能勝員外之詩思旨要眇遠絕畦畛外恍乎
結虹蜺乘雲霞以濯清冷雖然非或深于是要亦未能識也
故相鄂公故廷尉汪公于知員外尤深旣官戶部故尙書深
陽任公顧其僚曰符郎眞詩人今司徒嵇侍郎嘗對座客誦
其篇句之尤警出者員外志清行和臨事有守其賢於世不
徒以其詩也

杭堇浦符藥林雪泥紀遊藁序云歲丁巳春予友藥林符先
生南歸省墓渡錢唐暨二天子都周覽其景物息鞅舊里百
金之裝周貧問疾隨手散盡旣還京師手一編相託曰斯吾
雪中鴻爪也藥林體無凡骨意尙高邈潮平日落空江無人
萬慮壹澄靈響獨結釋道研之稱蘇瓊所謂竟將我致青雲
間何由論地上事也此誠內景之博徒眞誥之別子予故標
舉其趣以告來遊來歌者

詞科掌錄云符幼魯以工部侍郎休寧汪公保舉授七品小
京官在戶部監萬安倉宏詞爲靜海勵公所薦丁內艱不與
試詩章脫手清便氣韻尤高韻惟在骨始非俗清到無言但
得香詠梅句也又有句云秋山到晚露全骨涼月伴人成苦
吟又有句云三日不衣秋滿地蛩聲如雨落空山皆在人口
居京師刻春鳧小藁錢唐陳楞山以爲操舍自命不限常律

洗削凡近出於自然如春在花如意在琴軼妙造神難以迹
尋長洲沈碣士以爲如鶴鳴空山泉流斷壑使讀者夷然冷
然不自知其矜平躁釋也其爲名流所推服如此

隨園詩話云符郎中幼魯詩主高淡嵇相國爲予誦其三日
不來秋滿地蟲聲如雨落空山一聯余記其齋宮云寒雲添
暝色老屋聚秋聲詠唐花云當時不藉吹噓力少待陽和也
自開哭揚州馬秋玉云心死便爲夫自在竟歸仍返小玲瓏
小玲瓏山館者馬氏花園也屬對甚巧賀周石帆學士納妾
云藥爐經卷都拋却只向燈前喚夜深尤蘊藉

蒲褐山房詩話云余初入京時卽見春鳧主人時年已六十
有餘爲戶部郎常以病假所居韓家潭令余直入臥內床幃

之外書籤畫卷茗椀香爐列置左右几案無纖塵四時長供
名花數盞余笑謂曰入君燕寢已如在斷橋籬落間使人不
復憶西子湖矣其雅潔蕭澹非東華軟香塵土中人所能企
也蓋自少與樊榭堇浦玉几同學故其襟情如此詩亦清絕
不免窘于邊幅而翛然物外之致可想見其風韻焉

梧門詩話云符幼魯舊藏梅花研楊子苑仙見而作歌查儉
堂愛苑仙之才妻以女幼魯卽贈研爲聘且圖焉阮吾山賦
詩云琢就琳腴潑練光湘奩添得紫雲香才人一曲梅花引
不用吹笙學鳳凰花影娟娟鬢影嬌東窗紅日麝煤調玉臺
好試珊瑚管鏡裏春山著意描

楊愷曾字吾三號 江南武進人監生由兵部侍郎鎮國將

鶴徵後錄卷第二
軍宗室德沛通政司使趙之垣交薦舉



吾三傲岸負奇氣學亦澆通名公卿咸傾倒其人袁簡齋有
詩云吾三意氣顛如雷姓名久被羣公推昨日別我心不樂
拇戰忽輸三百杯

詞科掌錄云楊吾三世胄清華曾祖修撰廷鑑明崇禎癸未
狀元祖諭德大鶴有盛名于時父編修祖楫與兄學士椿先
後在詞館吾三與修曲阜 盛典偕從弟述曾並舉大科爲
海內所艷稱



鶴徵後錄卷第二

同里錢希憲校





70012542

